

Woidviertl pur

T & M: Ernst Köpl

Hurch, wås i dir dazö, wås fürs Herz, für die Sö,
kumm mit auf Lebenskur – Woidviertl pur.

Märchenhåft schena Woid, maunchmoi is gaunz sche koit,
unglaublich vü Natur – Woidviertl pur.

Waunn i so eineschau, siech i grea, siech i grau,
des ghort hoit ois dazua – Woidviertl pur.

Maunchmoi san d'Leit a scheu, vü wirkt oit, maunches neu,
aunders geht do die Uhr – Woidviertl pur.

Då und durt herb und rauh, stöt sa si mir zur Schau,
i hob wia und wo i tua – Woidviertl pur.

Gehts a net immer gut, valiern d'Leit net glei den Mut,
nehmen vü mit Hamur – Woidviertl pur.

Schau eine in des Laund, då gibts so ållahaund,
wia sunst im Märchen nur – Woidviertl pur.

Wüst du die Leit vasteh, muasst a ins Wirtshaus geh,
gmiatlich is so a Tour – Woidviertl pur.

A Gaude gibt's mauncherlei, vur da Arbeit is ka Scheu,
s'Lebm is wie Moll und Dur – Woidviertl pur.

Oftmois wie Nåcht und Tåg, d'Leit san a eigner Schlåg,
doch nie is die Tür gaunz zua – Woidviertl pur.

Aun Woid und aun Wåssa reich, bei uns båndt ma no im Teich,
glücklich san Madl, Bua – Woidviertl pur.

S'is gaunz a bsundre Freid, då håt ma no a Zeit,
vo Hektik is kaum a Spur – Woidviertl pur.

Unser Laund is zan lobm, wo mir san, då is drobm,
måchn a Murdsfigur – Woidviertl pur.

Håst auf daham an Frust, bei uns steigt dei Lebenslust,
die Wunden heilt mit Bravour – Woidviertl pur.

Kumm und du wirst as sehn und außerdem vastehn,
bei uns kriegst niemois gnua – Woidviertl pur.